


阮學校的圖書館



/黃慧雯

各位評判老師，各位同學，逐家好！我是○號，今仔日，我欲講的題目是——阮學校的圖書館。

圓拱門，玻璃窗，粉紅仔色的壁堵，水藍色的天篷。塗絞釘枋仔，壁面貼尪仔，看起來清幽開闊。跔佇內面，心情輕鬆闊快活。嘿！我毋是咧紹介新厝，是咧講阮學校的圖書館啦！

阮學校的圖書館，差不多有四十年的歷史矣！雖然無新，毋過外觀看起來猶閣嬌嬌；雖然細細間仔爾，毋過內底的冊濟甲若山。小說、囡仔古、尪仔冊、歷史故事冊……應有盡有。阮定定滾笑講：「學校好食物上濟的是福利社，tshit 迺物上濟的是運動埕，啊若冊上濟的所在，當然就是圖書館啦！」下課時仔，阮班大多數的人毋是攬對福利社去買四秀仔，嘛毋是浪去運動埕，是參我全款，翹去圖書館看冊。因為阮學校的圖書館拄好佇阮教室的隔壁，阮若行較緊咧，毋免三秒鐘就到矣！所以下課的時陣若欲揣我，來阮學校的圖書館就著矣！

坐佇圖書館內底看冊的我，就親像生翼股的鳥仔，佇五花十色的世界 tshit 迺。一下仔飛去三國時代看孔明三氣周瑜；一下仔飛去賣番仔火的查某囡仔身軀邊，陪伊流目屎。日頭光定定對透明的玻璃窗掖落來，涼涼的風三不五時走入來翹翹咧，共我捋

頭鬚、鬥掀冊。坐佇學校的圖書館內底看冊，是一件足享受的代誌，啥物煩惱攏放袂記得啊！

當然啦！十分鐘的下課時間，一目矚仔就過去矣！定定看猶未過癮，上課的鐘仔聲就咧催矣！若是拄好揣著恰意的冊，毋甘囡轉去冊架仔，就緊衝去櫃台辦借冊。阮學校的圖書館一擺會使借兩本冊，看兩禮拜，算起來真利便。

古早人講：「讀冊愛用心，一字值千金。」閣講：「時間像珠寶，時過欲揣就揣無。」趁囡仔時記持好，較骨力仔行圖書館，加看幾本仔冊，絕對有好無 bái。阮學校的圖書館親像寶山，內底無藏黃金，毋過有比黃金閣較珍貴幾若倍的「智慧」。歡迎逐家有閒來遐挖寶喔！我的演講就講到遮，感謝！